

四庫全書

集部

欽定四庫全書

集部

宋文選卷

十九至
二十二

詳校官中書臣呂光復

助教臣常循覆勘

總校官知縣臣楊懋珩

校對官中書臣王家賓

謄錄監生臣徐錫福

欽定四庫全書

宋文選卷十九

李邦直文

唐虞論

唐虞載堯之治曰謀於四岳欠欠焉憂其天下終身而
不得寧載舜之治吁俞疇咨以盡萬事之變而又巡狩
天下遂老於蒼梧禮樂兵刑雜然舉之而各有條理觀
其勤有過於堯者是不為無為矣而孔子嘗曰大哉堯

之為君惟天為大惟堯則之蕩蕩乎民無能名焉魏魏乎其有成功也煥乎其有文章又曰無為而治者其舜也歟夫何為哉恭己正南面而已矣學者嘗惑於此夫虞舜之所載者治之迹而孔子所言者治之神也何謂其然也夫營為動作之由已莫過乎人今完安無疾之人手可以執足可以馳耳目可以視聽而腹心可以慮欲有所措無不應者皆可以自為之矣則以為營為動作莫不出乎已及詰其極究其所以能然者則雖智者

猶不能自知也故由己而可為者迹不自知其所以然
而然者神也天地之化氣之所感雨之所濡莖葉之勾
直長短圓斜狹大華實之濃淡芬芳臭色之不齊味之
衆多莫不各足其形一陽之所溫一雷之所震飛者躍
者巢者穴者吟者默者或鱗而泳或翼而升或毛而羣
或介而潛莫不各足其分此人之所可見也此化之迹
也詰其何為而能然而誰為之者則明哲所不能計智
巧所不能匠雖聖人莫之或知也此化之神也人之可

以自為者猶不能自知變化之出乎天又果知天之能
自知其所以然耶故聖人法道以為用體神以為治溟
滓真樸漠然而全陶然而遂萬事不能滑其中安安而
有餘如遺天下者天下之人鼓舞之而不足用之而不
知自化也自安也自悅也自威也則終日言而如未嘗
言終日為而如未嘗為此堯舜之所以為大也彼昧道
者不然一君之心兩耳目之聰明耳而臨四海之廣穰
穰之繁欲御之以智康之以力矜其健察作其巧辯雕

鏤百為咻噢萬狀焦焦然日置天下於其胷中而又為情偽喜怒之所紛亂智索力殫矣而天下囂然方不可勝理則醇且醺愿且詐傑者為之僅得小治而已矣安能如嚮堯舜之治耶孟子曰王者之民皞皞如也霸者之民騷虞如也知此然後知堯舜矣故大聖人之為治雖有為於外必無係於心藏其神致其用使天下之人莫能窺已之涯諱趨奮起以為倖故靜而不爭所謂無為之治也後世王者闇乎有用樂乎無為不知堯舜之

神其化則又欲其標枝芻狗治天下溺入於老釋逍遙
寂滅之說兀兀焉宴坐於深宮以待天下之自治是烏
知孔子之所謂無為者歟

三代論

揚雄班固王通之儔莫不以三代諸侯為久安之術而
罪秦之郡縣至柳宗元獨曰古之諸侯聖人之意非不
欲去也其勢不能去也以為其治不若郡守嘗究之矣
夫王者處乎高危而以一姓孤立於四海之上一姓之

安危乃天下之所以為治亂死生也夏商周之君相傳者數十世雖有屈強之諸侯時不免於戰伐然亦未嘗有流血天下兵火之禍如後世者幾二千年而才三易姓亦必有大惡如桀紂至聖如湯武又其祖宗之著德甚久然後可以集有天下之諸侯自秦至於五代覆亡之宗紛焉如風中之槁葉生民數陷於大禍則是諸侯之前民數百年乃一擾而變侯置守之後天下之人常慄慄焉而無所係也論者多取周季戰伐之紛亂以為

建侯之罪夫幽厲懿夷之王較其昏暴王之於郡縣之時非莽卓盜之則陳項有之矣惟其諸侯之國各疆土據桀彊者未能并服而為一故衰亂而周不亡也論者又取晉之宗室舉兵相殘以為鑒夫以惠懷在上政亂於中而號令不行於天下於時謂之互市又使不義之君得舉兵以擊義國其微闇不道雖糜爛而亡不足怪也其所以未亡而再進於元帝者藩國之勢也故上有明天子則諸侯而治郡縣而治為上者其非道則諸

侯者亂郡縣者亡禍之輕重也有殊矣彼周之時吳楚
齊晉雖悖傲而不臣力非不足也而不敢曠周之鼎何
哉列國皆有兵有賦而用周公之禮樂彼未能一旦而
君此此未能一旦而臣彼由此而然也晉宋梁隋之所以
得扼吭拊背於中傳檄而天下定郡縣雖有忠勇之臣
莫不拱手聽命圍視而不敢動何哉天下之權素有所
一也兩漢之有天下王侯郡縣雜建而年以四百雖有
七國諸呂之難而劉氏以中興唐之有天下宗室為刺

史勲賢為藩鎮僅如諸侯之制而年以三百雖有齊蔡
燕趙魏之寇二朱安史之憑陵而李氏以長權散於天
下而莫能一也以天下之大而明主不世出後世鑒存
亡之效可不約三代漢唐之制雜樹親賢於外少為王
者之拱衛耶子厚之說未識治亂之大計亟云以為異
論耳不亦妄哉

秦論

易曰本乎天者親上本乎地者親下氣可上而形不可

上此必然之理也故曰魂魄歸於天骨肉歸於土天無形則無敝有形則有敝雖天不能使之易此言者也是故生而死堯舜之聖禹湯周孔之仁智之所同賁育之力之所不免也至秦始皇既以力併諸侯而以氣攝天下矣舉六國之宮室寫之咸陽之坂以為其居舉六國之玉帛而輸之函谷以為其用舉六國之女色鐘鼓納之於阿房以足其欲羣臣莫不稱頌其功德秦皇坐亡國之殿聽亡國之音趨走遮列亡國之臣心侈意廣自

以為萬世莫吾及顧少羽翼而升耳於是車轍馬跡交於海上登之杲浮江湘以望方士之所謂三島者棄其赤子航之於東夷以卜其所謂仙不務事事而跼跼然狂人客死於沙丘不得親傳之良嗣遂亡其國自黃帝葬於橋陵下及於三代之盛未嘗有仙之說至漢孝武侈欲極而外道之惑乘其隙而入用方士之言邀神靈而祠鬼物橋陵者存而方士輒曰此葬其衣冠耳又從而信然之以其女女方士與方士傳車而宿當是之時

天下幾大亂周之末有李耳者為虛無無用之語以高世雖背仁義之教而馳然亦未害為處士避世之小道也使李耳之存於時王者召而禮之不過賜之粟帛杖履而退之養之一丘而足矣至唐明皇曰李耳吾祖也今存而仙其位高大與天帝並遂推其言以為經而為之祠宇散滿天下賤禮樂刑政謂之俗務而弗親中國幾為安史之所有秦漢唐之君皆命世之才也咸以仙敗終其世而不悟可不良哉古之時王教之害尚尠至

後世而其弊百出曰楊墨者曰佛者曰老氏者循環而交以攻先王之仁義使仁義衰而異教立嗚呼自是以來生民之命搖然無所附矣其禍也始於秦而流於漢昌大於唐室至後世而不可破後之仁君將復有仙亡其國者矣

西漢論

嘗觀西漢之君大抵承秦之餘以剛斷明烈為任文景武宣皆有君人之至概宣帝以孝元柔仁知其必亂天

下已而果然夫人君之氣必主於剛其柔仁者濟物之變補事之隙時為之用耳不可以為常也故君者天也陽也其明日也其令風雷也天健而運日實而麗雷烈而威風行而無迹四者不廢然後可以生萬物而齊變化陽不足則天有時而裂日有時而虧雷或不發而風或不播休弛鬱塞之氣極而妖厲災疾作於下下至於昆蟲草木莫不蒙其疴易曰天行健君子以自強不息又曰剛健中正純粹精也剛健純粹此所以為天之體而

為君之德乎高祖最剛而最明故其基宇廓大而宏遠不可以亟壞其餘勝遺烈猶足以震動天下之耳目而制大臣之心故惠帝孱懦高后女主喑喑於簾戶之間而嬰噲平勃之徒攝衣而趨交臂而受職莫敢先後而不率至文景之為君其治出於恭儉仁恕然其君臣之間尊嚴而甚可憚繼之孝武雖侈且虐生民之屠於兵大臣之夷滅於法者幾且大半天下之怨可謂極矣而能興禮樂隆儒術拓土傳祚為漢英主孝昭幼而明斷

故燕王盖主桑羊上官謀發而中敗不得有所措孝宣承之覈刑名而責功實天下遂至於太平此六七君者亦非有完德具美也事之失度而過中者不為寡矣然且不失為治教化以之行社稷以之強固非以其有人君之槩主之以剛德而然耶元成哀平固未嘗有顯惡大過暴不若桀紂淫不若幽厲徒以懦弱偷墮無剛明之氣終不能一奮人主之威卓然有所立惜惜默默以至於亡可不惜哉有天子之仁義有大臣之仁義有匹

夫之仁義天子兼萬事之柄將以制中國而威四方而專為匹夫之仁處士之行拳然以小廉細謹自持者則是失其所以為大則天下無所恃而奸權嬖倖特以朝廷為戲維持牽制貿亂人主之所為各任其私意以暴民而侵掠天下人主雖不貪取而天下不勝其困人主雖不好殺而天下不得其生賢君則不然以為忠信孤遠之臣待我之剛然後得以立至弱之民待我之剛然後得以振其剛明以強本而威衆使內外大小皆有所

恃於上而天下不勝其樂書曰天降下民作之君作之師惟曰其助上帝寵之四方有罪無罪惟我在天下曷敢有越厥志此武王之剛也鑒乎西漢之存亡治亂則君之剛德可一日而廢之哉善觀君德者無取其一善一惡要其有人君之槩而已矣

東漢論

聖人之所以長有天下者無他得其民心而已矣末世之所以失之者喪其民心而已矣民心之所欲歸兵不

可以驅而散其所欲去利不可以誘而還也其事至近而所繫至大其說至易見而智亦時有所惑也西漢之亡也其君非有苛毒加於民特以柔闇而無決承之以幼懦主之以母后聰明威令不能過房閭之外而天下之柄姦臣得以盜而有非漢之失民非民之厭漢也及化為王氏有王田之擾有六筮之侵師旅興於前旱蝗繼於後夷狄攻其外寇盜攘其內使天下之民潰裂四出而不知所從遂以攻莽而亡之當是之時民苦其亂

而思嚮時之安以為能安天下者劉氏而已耳故聖公
起於荆盆地起於海曲王郎起於趙劉永起於睢陽伯
升起於宛皆唱之於劉氏奮挺以為器揭竿以為旗徒
步振呼而郡國之衆雲集霧聚莫不為之用雖有隗囂
公孫述張步之徒相與馳逐奮取卒所以得之者劉氏
也及天下定於東漢而百姓果得其所欲以光武之聖
顯肅之明其治皆雜於儒雅而隆師重道修舉禮樂以
率其民之興行為義幾多於三代殤安之後女主權

臣常握禍福之柄民之所以未入於塗炭者行義之臣奮不顧死力爭於朝以折嬖邪之鋒也及桓靈繼統宦官之勢愈烜赫於天下矣而賢者終不為之少屈彼賢者之盛於下知其必能再起劉氏之治而不利於已誅其一人則死者一人而已未足以痛杜其後而為忠信之戒也乃目之以鉤黨禁錮誅殺天下之賢人處士殆盡其禍蓋不減於秦又以宦官子弟為民之牧宰侵掠殘困民焦然不知為生之樂莫不搔掌捩腕疾視其

上欲漢之亡者蓋十九矣故黃巾一起同日而應者三十六萬何盜之多耶民以為漢德不若黃巾之可從也及東漢將亡所謂袁紹袁術者以庸庸之材幾有天下之半人歸之者襁負而相屬彼以袁為可歸耶誠以袁氏繼世為漢三公其所出力而排禍難者德有多於劉氏如此而已以此知劉氏之見絕於天下也孔明承之又欲以區區之蜀為光武之舉信大義而復之漢其名雖盛而四方莫應豈非民心去漢而然哉勤苦艱難終

不能以亟定是非昭烈之罪桓靈之惡怨於民心之深也其如霸蜀之業則孔明之才力致之與魏吳他姓之興者蓋等耳非有思漢之助也西漢亡而復之之易東漢亡而復之之難民心之去就可不畏歟書曰民可近不可下故王者之禍莫大於失民心或曰漢之興亡天也非人事也是烏足以知治亂

魏論

孟軻之言王道常賤利而本仁義當世之諸侯皆謂之

閭疎而後之學者亦或疑其為空說以示訓嘗竊觀之
先鈍而後利王之易者莫若仁義之為用小利而大拙
力殫而功少名敗而實從之者莫弊於權謀也周既亡
而秦能一天下之諸侯秦之亂高祖起兵才五戰而天
下定於漢西漢之業為莽所盜者十二載而世祖興世
祖之興三年而復為東漢高光之建業一何其易也基
宇一何其宏大也傳之子孫一何其長也東漢之亂豪
傑據國而虎爭善用兵者莫過於魏武建安之元始迎

獻帝以入於許自是中國之權歸於曹氏官賞兵刑紀綱號令莫不自曹氏出漢帝挈挈守空器而已於時取之之易若拔一毛然而止能集天下之勢故不敢取用天子禮樂者凡二十五年而身終於北面及丕受獻祚四方之君者三魏一再傳而其政已為司馬氏所有觀魏武之建業一何其難也基宇一何其狹也傳之子孫一何其弗永也豈謂魏武之用兵不及於高光耶謂天之意不欲天下之並定於曹氏耶謂用兵不及於高光

則魏武固能兵矣謂天之意不欲天下之亟定則天下之厭亂不為不久矣何難易小大長短之不相若也如此嘗以為天下大物也不可以詭譎服不可以威力御有偽而霸無偽而王有偽而享國無偽而享天下彼高祖世祖之所以興雖褰裳奮劍馳逐而得之然皆有仁義之資忠厚之量故人心易一數載而成大業已成而天下怡怡不復搖動魏武則不然其治身其任臣其使民其取天下一本於詭譎威力無復錙銖仁義忠厚之

實是以孔融楊修誅死而不肯臣荀彧感恨暗噎而斃
天下義士雲長之徒掉臂而徐去管寧之屬浮海而避
之惟得巧詐之士而與之共國競競焉憂竊發之變故
雖虜張繡走二袁擒呂布馘高幹戎旗北指而烏丸蹋
頓為之破兵鋒西向而宜堪超遂為之平有智者莫不憚
有力者莫不屈兵強戰勝而天下益疑之思與之為敵
用力勤於二漢而土分於吳蜀垂業至於二世而運奪
於宣景何哉失之於險害刻薄而不以仁義忠厚撫天

下也人之形可刼而人之心不可刼人之財可掠而取而人之心不可掠而取天下之土可以強而兼而天下之心不可以強而兼迅疾不讓怒若風火者雖速必緩欺其人而得之者雖得必失得民之心者不欲有民而民必歸之大國之賈出其貨財貿易於塵市持之以信守之以廉意思閒緩如不欲多得者故利之歸也愈厚其為富也必久有貪賈者持籌如變化罔利如寇攘人由是莫敢與之賈以至於餓而死孟子曰苟行仁政四

海之內皆舉首而望之欲以為君魏武何知焉孔明之為蜀先以仁義治其國後以仁義之聲動天下三州舉土以歸於我而輒不取是以一舉而魏之君臣相聚而憂當是之時民心雖已去漢以孔明仁義之才挾備而自為亦可以有所立天下之未歸蜀者特須時耳孔明不幸功未成而且死使孔明不死魏吳其一而為劉蜀乎孝明之區區焉能抗之哉

梁論

先王之教皆本於禮義世之不得則不生如此其急也
然而禮義之教至後世日以消亡而以之大亂有賢者
出莫不欲引古而復之而已亡之教終不能復佛者夷
狄之教也一入中國中國之人為之奔走惟恐在後衣
食可絕而佛費以為不可絕法可犯而所謂戒律者以
為不可犯父母可慢而以為佛不可慢流熾植大至於
今世而日以盛有賢者攘袂而詬之操矛而攻之力憊
矣而終不能去何禮義之去而不可復佛之來而不可

去也是亦有說焉夫小人之情好私而忌公禮義惟公而佛惟私小人常多而君子常少此禮義之所以易衰而佛之所以易盛也所謂公與私者何謂今夫禮樂之為教人果秩秩而循之則終身安焉而不抵於戮辱其利於人者為不少矣而小人莫為彼佛者之說則曰汝且終日故其情欲殺人以逞欺衆以牟財已而事吾佛則罪釋而無害汝且朝而為惡夕而事佛壯而為惡晚而事佛不惟罪釋而無害且有厚祿而加汝焉書其效

於紙揭其狀於壁小人既不能無為惡故為惡而得利則分其財於佛之徒以求解如是盡天下之室為佛居舉天下之衆為佛衆亦不足怪也故曰小人之情好私而忌公禮義惟公而佛惟私小人常多而君子常少小人固無足異矣又況世之君子時有陷溺於其教勝而唱之者耶嘗觀東漢以來佛說之惑世晉之末凶悍驕逆屠滅生靈以為戲其暴過於豺狼者莫甚於石虎姚興禮義曾不足以動之而畏佛最甚下此則高齊既以戰得

之弗返於禮義以靖亂而欲事佛以自救梁武之用兵亦工矣侯景之師將至於城下而率其臣誦佛於庭卒以此亡國不亦悲哉夫既天下之信尚之也小人之倚佛以為貨者把執禍福嚇欺愚聾如挾券質量其所入金錢之少多而交手買賣上至於京師下至於夷狄至於一邑之衝一鄉之聚必有其徒焉如是者紛紛於天下上之人不能盛禮樂之教以敵之其所以為治者一皆出於文法固以薄矣而文法又多為姦吏之所貨姦民

之請於吏隨其重輕或可以得意幽則約於佛明則要
於吏私既勝而公道廢王者禮義之教皆不預天下之
權嗚呼安求其不大亂也斯弊也根固而源遠不可以
亟拔不可以亟塞矣後之君臣陷溺於此者其不觀梁
之所為乎

隋論

治天下者以王道不可為之以吏治吏治可以苟天下之安而
不可久也純以王道而治者三代是也吏治與王道雜

然而用者漢唐是也純用吏治者隋文是也自禹至於桀自湯至於紂自武王至於赧三代長久各數十世安而少變者幾二千年自高祖至於孝平自光武至於獻帝自高祖太宗至於僖昭茲二姓者或四百年或三百年不及於三代之長而有過於歷世之祚若隋文帝之於天下於時亦可謂之治平而寡事矣然才三世三十九年而亡其故何也吏治與王道之效不同也故三代用王道而長漢唐雜之以吏治而不及於三代隋文專

以吏治而不及漢唐是非王道與吏治厚薄之效耶夫
隋文九年滅陳而天下始一奮勵於為政每一坐朝或
至日昃五品以上引之論事宿衛之士傳飧而食至於
兵革不用天下游食之人戶口歲增過於兩漢其富庶
而康寧如此常人之所謂太平而識者皆知其不能久
也何者無禮義以維持其政無忠信以固結其臣教化
不足以導其民紀綱不足以防其後一切以辨敏勤察
為能處三王之位而卑卑焉任智數覈文法此特吏才

之尤者耳非王者之為也故王通謂其終以不學為累而房喬於清平之時而獨知其將亡彼或用王道而常為百世慮國祚之永人可得而近測之哉嘗觀於三代其為治之旨皆本於仁義禮樂先教化而後刑名厚道德而薄功實其始雖若迂遠而其成以至於兵寢刑措暴炙百姓之耳目浸漬涵糅百姓之骨髓其勢蟠大膠固如置方石於平土之上天下之形可以漸亂而不可以亟壞也末世中君德既不及於古才亦不至於道所

用者皆俗人而所尚者皆細法爭於功用勇於擊斷謂簿書刀筆之間可以為治語之以王道則項背而竊笑強者為之反其盛猶可以自守一有勢罅則怨心紛然內外皆為之擾動姦豪乘其弊而起其撓天下如驅羣羊而蕩王業如振歆器耳是故民衆而益亂地大而益危嗚呼彼安知三代有長久難動之法乎後之王者鑒於三代兩漢隋唐之事亡恃吏治之安而留意於王道斯可以長有天下之民矣

唐論

天下之亂常起於內不起於四方先之以朝廷之姦繼之以藩鎮之盜未有朝廷無竅隙而藩鎮敢叛渙者也人之弱於氣者寒暑疾病易為之侵木之傷於心者風雨蠲蠹易為之敗明君賢相整予法度修予甲兵撫予人民雖有強梗必為忠順一有弗率天下之所共攻也苟不能自治雖有臣妾必為豺虎唐之亂也人皆知藩鎮之亡而不知唐之有以自亡也一軍闕帥上擇賢人

置之則已矣而必取帥於其軍其姦將豪卒內交強臣而外交勅使以市兵權得之則取償於其民宦者之使陰得寶賂偽以一軍之勢嚇劫朝廷而取必彼小人者一旦據土地擁旗甲權盛氣完約堅謀合罔不睚眦自疑恃衆而為盜而朝廷方且用姑息之法慰之以金券飽之以玉帛欲以息兵此其所以樹兵者歟柄既去矣藩鎮既強矣又不能信任天下之賢以為將相使之整法度脩甲兵撫人民為所以禦盜之具所以圖事於宮

中不過一二邪臣三四宦豎措置萬事舛謬顛倒方正之路塞倖曲之門開惟埋藏機牙以中傷賢者為事故天下之心咎其上而易以生變此以見非獨藩鎮之亡唐而唐之有以自亡也有國忠林甫之蔽然後有函陵之師有魚朝恩程元振之讒然後有永泰之亂有盧杞之邪然後有奉天之厄有惠王昭愍之驕昏然後有藩鎮之叛章武中興一裴度而已裴度用則藩鎮為唐之臣度不用則藩鎮為唐之盜故曰天下之患常起於內

不起於四方也杜牧善論兵其為罪言盡河北逆順之勢曰上策莫如自治中策莫如取魏最下策為浪戰夫蠻夷盜賊彼雖無賴然亦有桀黠之才小人之智有以窺測朝廷之所為權量其輕重強弱而自為計我自治且弗辨則蠻夷盜賊投其隙而動使唐之君皆能如杜牧之言而自治任得其人政得其道則藩鎮為我之手足耳目竭蹶趨走之不暇如正觀開元時矣焉得而憑陵哉

五代論

天下之治亂如昏明寒暑之相從也五帝三王既去而天下為秦秦亡而為漢自漢帝之元年歲在協洽以及於今千二百有七十年其間亂世多而治世少基業宏大足以傳之子孫而久者漢唐聖宋而已魏雖有蜀而不能有吳及魏入於晉晉平吳而天下始一一之者未久散為一十六國而晉遷於南魏起於北魏衰而又為東西東魏入於高齊西魏入於周閔相與鼎峙而立周

能併齊而天下尚為二及周入於隋隋既而平陳然後
一天下而君之隋不能堅又化而為唐唐亡而為五代
抑亦屢變矣舍夫漢唐而觀之餘據土而君者一燭火
之明也然而自古亂亡莫甚於五代周秦漢晉之間以
兵攘間有天下之豪傑或借仁義本謀術五代之際率
皆兇卒小盜公行而無媿膾戢生民而盡之禮義廉恥
無髮遺矣莊周曰後世必有人相食者豈知後世之亂
有過於相食耶然而不大亂不大治五代之大亂天所

以開聖宋也宋有天下相繼者四明聖百餘年間生民之安過於漢唐內無擅威之臣外無強大諸侯下無姦民攻掠之變十人之盜起則不月而傳駭於天下之耳目況能容大盜耶其安治如此然而識者觀天之勢尚為之憂慄而不寧其故何也夫始治者天下之所樂而久治者明知之所憂也實之美者多蠹味之甘者生醯鷄康樂而克逸者萌疾病物慎乎其極則必至於變古之王者知其物理之極懼其變而為危則先自為之變

使變而治此其所以久也居治之久而未知所以變此
非今之可憂者與今天下之民丁黃老幼孳毓而繁夥
其數多於漢之文景唐之貞觀開元見生齒之極於此
矣耕者升山巔樵者入窮谷土不為不辟農不為不力
而常有凍饑之人天時豐穰則中戶已上歎歎僅足一
有水旱螟霜之歲則百姓流冗轉移相枕藉而死於道
路可以常豐而不可以有凶災見其用天時出地利之
極於此矣國之於利算及行人租及動物小吏為公家

而坐列販賣如賈人焉者信於治人之官世入之用朝而夕謀夕而朝憂有日月之慮而無二三歲之計可以常無事而不可以忽有為可以常靜而不可以一動見財力之極於此矣至於上之政令下之奔走或疲極而倦厭而朝廷之治特為媮且欲以循循而格萬世之安卒未能磨濯剌剌奮然而有所變竊恐其失於不變也天下之治亂如昏明寒暑之相從也可不前計而預慮者哉

[illegible]

宋文選卷十九

欽定四庫全書

宋文選卷二十

李邦直文

策旨

王者與之議天下之政有大臣在而又收訪賤者之言
何也以謂人有遠近貴賤之殊而道則公治亂之計各
或知之使之畢其說庶幾有補於世非特求其有補而
已夫王者之於臣下既用則觀其事未用則觀其言事

足以見其才言足以見其識故取人之微術莫若以其言也國家嘗詔內外官有可言者皆得置郵而聞之於上然其所陳之類不過法令金穀之間鮮有以仁義發揚人主之聰明而惠澤天下者朝廷亦嘗賤仁義之說以為汗漫無實而不適於事變夫珠犀象玉生於江海匿於窮山不遠千里皆列於人君之左右豈非以好之者篤求之者勤而後至於前耶珠犀象玉玩好之資耳言之可貴非徒珠犀象玉也陛下好之篤而求之勤則

仁義之言日至賤之而弗為貴則嘉言不至而庸言來矣且陛下繼祖宗大業數十年間寬和門安無為而治以法堯舜未嘗有深誅痛斷於羣臣而奸邪睥睨傍有所憚而不敢輒肆矣其然哉畏指議者之不已也則言者之為益多矣綠衣小臣生長聖時樂於父兄師友之教行己之外竊嘗志天下利病僅得其一二大者故因可言之會條其畧於篇以為貢臣以為古今之治無法者不能久悲申慎之愚於法而叛仁義故有法原事有

形勢善同而功不齊為國者不可以不知故有勢原禮
樂教化非刑不立故有議刑二篇國之興亡治亂常起
於兵不忘用兵者兵置而不用故有議兵三篇瘡瘍非
心腹可憂之疾瘡瘍未止心腹之氣為之弗寧內疾或
從是而起夷狄外物常擾吾治故有議戎二篇官治則
事治事治則天下治故有議官三篇義利相形不得其
中民必止散故有重計備不可不預兵為國命焉為兵
本故有實備孔子曰赦小過舉賢才其斯為政故有明

責激貪扶懦別白賢不肖故有勸吏根本強固木不可
拔愚其宗子秦以亟亡故有固本化風不行王業終不
及於三代故有厚俗未有左右正而事不治者也故有
廣助士不素厲亡以應猝故有養材尊君卑臣法一而
分定治天下如治一人故有審分政為神物王者司之
援古鑒今可以善其後故有操柄窒禍本導其君於文
明故有解蔽姦臣之所欲為者使人主素知之故有辯
邪臣聞鮑宣之言少文多實史氏稱其忠臣言雖褊迫

不文然皆當世之可行者涉其目可以知其大指有策
旨

法原策

法者何也聖人所以齊天下之動至公大定之制也其
原出於道德禮義而其用散於號令賞罰凡有天下之
君未嘗有無法而久者也昏世嘗有無法之君矣奈何
乎人之多欲而趨亂也如歸市人之多欲而無法以齊之
故有臂者攘有足者馳勇者苦怯者而奪其資知者給

愚者而兼其利聲色耳目之奉紛紛籍籍其去禽獸者間不容一毫故聖人為之法使天下強弱小大貴賤遠近莫敢不一於法焉由法者安不由法者危由法者得其所欲而生不由法者失其所欲而死如是故法立法立而天下之心定而治道畢矣法為貴君位次之法壞則民亡民亡如之何其尊且安也故人主尊法懼法之不立也故以身先之懼天下之慢法而法壞也故一舉事而不敢忘法賞罰以法號令以法取予以法廢置以法

殺生以法動靜以法視法如神物而不敢侮如天墜地
設不敢輒破壞改易也不以一事小害而損法不以一
時苟利而增法使天下無有不由法而自為者故智者
不得越法而謀辯者不得越法而議士不得背法而有
名臣不得背法而有功我善可抑我忿可窒而法不可
離骨肉可刑親愛可滅而法不可屈也故雖成王之叔
不得以流言而亂政高祖之父不得屈君臣之儀文帝
元帝之子不得越王門絕馳道光武之姊不得保臧獲

奸使吏民愛若孝王嬖若韓鄧功若陳湯馮奉世義若
郭解不免於有司之議而天下不敢私恐其開亂法之
原而後爭以為比也故明王之法左者不為右右者不
為左上不奪下職下不使上事為廷尉者不以才有餘
而道禮樂為太常者不以官優寡事而議刑法士者不
為工商賈人不為士也令史大匠之起巨室彈畫一定
木之曲直小大長短必皆就吾繩墨規矩焉其參差不
齊齟齬不合則斤削燎括而已矣若毀我之彈畫而從

木之情則工勞事拙紛擾而不可理矣故聖主立法賢
主守法立法者使法必出於道德禮義而後布之天下
以為法守法者使賞罰號令必出於法而後以為賞罰
號令法不出於道德禮義者弊法也弊法者非法非法
者未久而還賞罰號令不出於法者弊政也弊政者非
政非政者法壞而天下不服故法一則成法二則疑法
固則君尊法搖則君削法行則要而治多法不行則煩
漫而無功今夫一人之寡居深戶之中傳盈尺之紙而

風驅電行殺生廢置人於千里之外提癰夫羸老僅勝
衣冠之人付之寸印而坐諸帷幄進退萬夫若羊鼠然
童子據輿室羣湖海之珍怪處女嬰珠玉而立乎衢途
烏獲戾目而不敢動以法在也故天下視法如藩籬立
法如封界强者以攣縮弱者以安全至哉法乎人君之
衛天下所恃而生也闇主則不然不能以法制勝私欲
不知己亦待法而後安故從欲而慢法其意若曰法者
我之可自出也何有於法哉暱乎所愛則無勞而封爵

有罪而不誅或利害僅如毛芥而輒變大法名分不立
百職相侵日革月易人不知所循下皆知法之易撓而
可踰也則險庸譎詭者舞其私意以動法倖設便僻者
倚上之恩以貨法悍暴傑僥者奮其亂力以干法如是
故法亡法亡而民亡民亡而國亡矣如藩籬然臧獲者
超履穿穴而主人勿禁安能使盜之不窺而保其室中
之所有也如封界障隧然其羊童牛牧已嘗有蹊之徑
之之迹矣安能制衆人之不來而全其果蔬稼穡也或

曰法之說無乃膠固滯事而失於圓通徇物之道歟曰
不然法者天下之公也千世之守也大道也通者人臣
之私也一時之偷便也短術也法同而治異者吏不能
舉法也吏之罪也法不可輕立亦不可屢變也立法之
主必若禹湯文武漢祖唐宗者也議法之臣必若皋陶
伊尹周公蕭張房杜者是錯且尚勿免況庸人乎臣
竊規今之世朝廷或弛祖宗之法羣下或慢朝廷之法
大臣或率胸臆而輕法庸士或作衆辯而侮法為牧伯

者或擊斷於法外以為能臣恐紀綱制度緣是亂法緣是而亡故作法原

勢原策

君之所以安危國之所以存亡治亂令之所以行不行勢也不善知勢不能為創業之君不知勢之可畏而失其所以審度將順不可以為持成之君經治之臣故善用國者勢而已矣理勢循則行忤則變動則險止則平輕能重緩能速故物有至小而力不可勝即事有至易

而功不可勝原發如毫芒針端而巨若丘阜本在拱把而遠際窮髮者勢也如戶之運也如車之馳也如弓之圓也如矢之激也如衡以一權而舉數倍之重也水之注於卑澤也原火之燎於風中也兵之奮寡而走衆也人之乘高而制下也勢也豈惟萬物為然今夫一人而勝天下之大制天下之衆兼聽天下之廣沛焉有餘非勢而何如也故明者用勢而闇者用於勢明者提至要之處持其關鈕制其機樞動靜在我開闔在我弛張在

我一教一令一賞一罰必輔之以形勢故教之而行者
易令之而從者速賞一而千萬人勸罰一而千萬人懼
仁少而悅者多義近而服者速無他理勢為之也教令
賞罰仁義而無形勢之輔必且人人而治之矣人人而
治之教之行也必艱令之出也必煩天下之善有餘而
賞不足天下之惡有餘而罰不足天下之民無窮而仁
義不足無他理勢不先也夫千世之君可屈指而數之
矣或善或惡或仁或義其間差不能銖寸而功名輒相

倍蓰禍福輒相百萬者無他形勢之異使然也成湯祝
獸網而歸者三十六國文王葬枯骨而天下三分有其
二千世之君德有大於此者矣而湯文用此收天下之
助其從民情而集天下之勢也方形勝之在桀紂夏臺
之囚羑里之獄如拘亡夫及善惡之暴也形勢之變而
遷也如林之師而莫敢射車中之木主故天下之勢安
則動難動則安難當其安也垂紳端委深拱於堂與戶
牖之內而高論治古之上尊明如天日閎隱如震霆照

照如雨露肅肅如風霜指顧叱咤而天下莫不趨走鞭笞海外之島蠻若制童妾雖有劉項之魁雄曹馬之姦桀必且老死民籍而不敢倡及乎昏懦為之也席先王之位傳先王之民朝有遺臣故老事有綱目軌度先王之澤未涸天下之勢未運自視其安也以為無有危事也任一喜怒從一嗜欲矣而患未切已也以為可為而無傷也習知天下之尊服已也以為人終古莫敢蹙路馬之芻觸圉兔之毛也簸頓關紐嬉弄機樞動靜不以

時開闔不以法張弛不以節淫樂在宮中而怨毒被天下
略易在一朝而禍患遺千日民心之他屬也君柄之
旁落也勢之翻然而離也雖欲安之不可能也竊譬之
山之高厚也萬夫不能毀壞也朽壤生乎中歸石震乎
上及其傾也人力不能支柱而維持也非天事也勢也
故前聖創業起今之利變今之害所以治天下之具甚
備憂天下之慮甚深紱民心而久天下之勢堅牢固密
為不可拔及其久未嘗無罅缺蠹漏也然而其剝也亦

有漸矣在後聖時節其勢而繕之耳汰則約之危則平之擾則靜之微則養之弱則扶之急則縱之緩則持之塞則導之使萬事之理百物之節皆不至於窮極而大變則勢久而長無危亡之形矣故勢之在我也我蓄積之固執之審則發弗便則居故勢為我使而天下莫能逆也若一失其要則橫肆奔悍於外不可復之雖有天下一旦驅擠排壓而仆矣臣故曰如戶之運也如車之馳也如弓之圓也如矢之激也如一權而舉數倍之重

也如水之注於卑澤也如原火之燎於風中也如兵之奮寡而走衆也如人之乘高而制下也其動不可不慎也人主知勢則處治如將亂處存如將亡處安如將危而亂與危亡亦且不至臣故作勢原

議刑策上

治天下如治馬馬之性剛則跂恐則齧氣作而脉張風逸於野乘之者將有奔墜之患故必待之以轡節之以銜揮之以策欲速則速欲止則止使之無一不若吾意

者然而治馬者亦有道行之以其塗羈之以其節策之以其事調順而不亂約易而不煩時其強弱而視其力之所任馬於是乎循理而服駕矣有越人馬不善治馬行之也非其塗羈之也非其節策之也非其事馬於是儋張狂惑而愈不知乘者之旨則馬之性妄行而乘者不得安矣故天下者馬也轡銜鞭策者法令也法令之使民如鞭轡之治馬聖人之善使民如王良造父之善治馬民之不可治之以苛如馬之不可迫之以煩也故

法貴易知令貴易行法必簡而明令必約而信使民曉然皆見上之意則疊疊而從之矣而不善治民者繁為之法苛為之令使天下之民前有罍羅後有陷穽左則木索右則桁楊民皆惶駭惴慄不知自免之路而愿者或有所寘姦者或有所逃天下之詐日起而法令益不勝如是祈民之和順而循理安可得也故曰畢弋多鳥亂於上網罟多魚亂於水扼之齊之而馬知詭銜竊轡故夫法密則犯者多犯者多則法不勝為髡鉗赭衣本所

以涅小盜也髡鉗赭衣者大半於天下則相率而捍法
以為大盜任彊吏持急憲本所以搏摘隱伏也隱伏盡
露法不足以勝之則不復隱伏而公為姦羅取細罪本
所以止民為罪也不為罪之民既已羅入於罪而抵誅
則不復愧恥畏讐然後為罪自古尚法之世莫過於秦
秦用商鞅李斯之術以繩天下令民什伍相司偶語於
市則刑棄灰於道則誅然天下之所以叛秦者以法卒
所以亡秦者以刑人也漢祖乘之約法為三章蕭何裁

增為九章極簡易矣宜罪有得漏而姦有得為然事益少民益畏罪至孝文而刑至於措具緩急繁簡之不同而治亂之勢異何哉法不可極而民不可勝也聖宋之於法可謂矜慎而留意矣太祖始詔置士官太宗設審刑之職章聖皇帝又建提點刑獄之任歲必下寬詔滌桎梏而厚繫囚之飲食吏有深法而枉民於刑者廢抑而不得遷以懲其酷能活一囚之不當誅者弗論歲考弗用保薦而輒增秩以勸其仁凡以疑獻聞上者皆生

之其矜慎而留意如此宜有漢文刑措之效也而天下之執重繫者歲歲加多舉天下之民能終身而不受笞箠闔戶而不在刑籍者歲歲加少其所以然者臣以謂國家有輕刑之名而無輕刑之實法苛密而輕令煩雜而亂別勅他禁數倍於律由是之至也自古議獄之深者皆指秦以為首而臣謂今之民罪有薄於偶語棄灰而入者矣如之何安視而不為戚戚也

議刑策下

天子仁聖如此天下之民常患不得其所朝廷慎刑如是而臣謂之過於秦法何也古律有浮於事可蠲而未蠲令制有失於當可刊減而未為刊減者也今之律蓋秦漢之餘法而累世增損附益而成之可謂小大無失而輕重無所漏矣巧民真姦善為天下未嘗為之罪亦皆有所科條而不能出乎其中矣不知向者又為無名之法而附於其末曰不可言而言不可為而為者皆坐之以彼罪之有狀而可科者既律之所不容凡無狀可

科者則亦無罪而已又施羅織之意於其間以開苛吏舞文之端則行路之人皆可取之置於理一步作一磬欬揺手反臂無不觸罪上官之率私怒而加害於小吏吏之所以生意而牧良民者蓋莫不用此使無罪之吏坐此而絀殿無罪之民坐此而榜毒此律法之過焉者也古之為法之意丁寧而詳悉其大旨防民之為不義故為之法輔義而行之苟得其實則刑之殺之而民莫不服知其出於義也自咸平及於祥符及於天聖自天

聖及於慶厯制勅之目數刊矣慶厯中刪之得一千七百五十七章頒以為定法其立法之日常汲汲於貨利而重募告訐之人涉禮義而輔教化者曾不能半夫上射利於下下競利於上上事利而用刑故刑之而民心弗改知其出於利也古以義用刑今以利用刑此勅法之過焉者也古之遺法曰律曰令曰式今之通行之法曰制勅曰附令故律所以佐典禮也令式所以佐律也制所以佐律令也附令所以佐制勅也故律有定刑而

令式無定刑有事不循於令式者一止於笞所以為中法也今之慶歷勅或有定刑或無定刑律之而無定刑者輒鞭笞而勅法之中類多細防薄禁事有微小於令式之所約者條責簿書之朱墨按比券契之遲速賦役之常格廩庫之成事賣買之煩期會之末課督征權而欽會毛草其纖悉煩碎類非國體之大此皆宜傳諸令者而遽列於勅法更民毫釐之差亦獲大咎刑加於犯令凡數等此宜為令而為勅之失也臣以為律法當言

當為主科可以蠲省惟幾其有名之罪則文吏不得高
下其手責利之門少告訐之路閉則天下國家先義而
後利制勅之所禁煩細而無定刑者審擇而附之於令
則薄罪不陷於重誅釐此三者刑庶幾乎清而民樂其
生仁主之澤洋洋於天下矣

議兵策上

天下之事莫難於兵天下之才莫難於將今夫奉法令
畜士民雖提頓矯暴之其逆順禍福持非歲月之久理

勢之極動之有非是虛徐而議彷徨而止利可以緩從
患可以中避若夫羣數十萬之衆局熊羆之氣聚犴軀
虎臂之力制之非其道則若奔馬之轡不可收厲吾人人
而敵人與抗伺我有釁睨我小跌一有形罅若弩羽之
來不可障是故朝為勝兵暮為野骹朝為彊國暮為丘
墟其存亡死生之速如是故曰天下之事莫難於兵生
者人之所甚樂死亡人之所甚惡將使人觸白刃冒流
矢赴死如赴生安逸人之所至願勞苦人之所最病將

使之草食水飲介冑而騎角逐出入於死生之場趨勞如趨逸耳目之衆也將使之莫敢不一心志之異也將使之莫敢不同我之迹將使之不可窺彼之情將使之不可隱故曰天下之才莫難於將一治十十治百百治千千治萬萬一者將也百萬者兵也以一人動靜進退而百萬之命繫焉故國之命在師師之命在將國輕用將將輕用師危亡之本也非仁不能以懷物非威不能以戢士非勇不能以震敵非智不能以應變非信不能

以固結專於仁則慢而不為用專於威則怨而不為用
專於勇則力折而機誤專於智則聲蔽而實窮專於信
則事滯而利失備者多勝專者多敗故將之材得則兵
未戰而先勝將之材失則兵未戰而先不勝有不可用
之將無不可用之兵將勝則兵少以為多兵弱以為強
將不勝則兵多而易亂兵強而陷速知兵必勝之將其
大略蓋出於智謀仁義而仁義施之陽智謀藏之陰陽
明而無不知陰潛而下不可見至哉知此者其知所謂

為將乎故良將之材未易有也有之而未易知也知之而未易用也用之而未易終也非至君不能用將非至將不能用兵非至兵不能破敵兵事將材之難如此太祖皇帝角材智合寇讐而任之即位之四年慕容延釗入荆南高繼冲獻其地五年王全斌伐蜀六年降孟昶平三川十一年潘美之兵趨廣南數月而繫劉鋹十五年一曹彬橋長江過師於采石十六年拔金陵俘李煜將明卒銳勢如決河海聲若走風霰素定之策印圈鑰勘

不失尺寸算日數刻以俟捷奏積世之珍入於王府數路之籍登於版圖以此之將將此之兵故兵用而武功成將出而敵國破長募遠據以授後聖太平之業百年餘矣廟堂之上習於安娛轅門之口恬於恭養兵不知律將不知兵國不知將觀今之所謂將其在內者徒車騎容冶日奉朝謁利厚祿以肥子弟苟聲色美田宅而已其在外者背公養之費約結要人酣歌玉食希冠蓋之譽庇占惰卒便豆觥庖廐織絳繡畫針韓鳧鍛伎巧

玩好之事而已其於訓練之精粗賞罰之後先士氣之
強怯地形之迂直鴟鵂之踈密敵情之誠僞慢焉不知
百一以此之將將此之兵是故治安閒暇之日名繁數
稠高位大俸索上農夫十戶之賦足以給一兵悉關市
之征不足以奉一將濶視侈言尚各不滿一旦走檄傳
警投之敵前而用之小出必小挫大舉必大北血丹原
野膚殘鈍釵四夷以為大噓非天之災非地之變非時之
不幸國不知將將不知兵兵不知律之禍也韓非曰所

用非所養所養非所用故臣願陛下於優安寡事之時
留神於兵垂意於將當塗以收之當街以驗之投之以
難而觀其決付之以事而觀其應問之以疑而觀其慮
嘗之以故而觀其材愒之以險而觀其忠較之以氣而
觀其勇則將斯得矣詩曰迨天之未陰雨徹彼桑土綢
繆牖戶今此下民或敢侮予孔子曰為此詩者其知道
乎能治其國家誰敢侮之北有柔陘之諸部西有赫連
之遺種南有盤瓠雜獠丁黎餘民陛下畜十餘將練數

萬人守則守戰則戰四邊必睨睥而不敢背慮之有素誰敢恐懼中國而侮之者陛下垂拱於太平之上澹不旱圖歲苟一歲日苟一日養不可用之將蓄未嘗戰之兵猝有風塵從疆塞而起擾吾赤子掠吾土毛然後駭而為之則亦暮已

議兵策中

用兵收將之術臣概舉而奏之前篇矣請為陛下言其詳兵在內則內重兵在外則外重內重則強外重則弱

兵在勲臣則勲臣重兵在近戚則近戚重兵在官臣則
官臣重上重則安下重則亂唐太宗定天下增隋之舊
開折衝果毅府以統兵籍設十六衛以宿將臣或蠻夷
侵邊強臣不朝則取兵於府以事剪伐取將於衛以典
師律事平功成則將歸於朝以奉宿衛兵散於野以力
耕鋤兵雖有籍而府實空將雖有名而權實去兵將在
內而京師實重又兵雖有籍而府實空是故無飼養之
費無姑息之勞無一旦之變將雖有名而權實去是故

無震主之忌無難制之勢無擅威之姦兵將在內而京師實重是故無尾大之憂無外侮之虞無割據之漸自古制兵之術莫善於唐太宗者兵農混一僅如宗周故王業最治至唐中年府兵廢而太宗之遺業勝事大壞兵重於外而不歸故藩鎮強大而叛兵重於內而不制故宦臣得柄而逆傳十餘君焦思勞精卒不能復以亡唐室流熾五代肉爛魚餒在外者分裂方土號闕內視在內者收把威柄暴悖上陵五十四年傳六姓十四君

而天下生靈百不一存矣太祖皇帝神武聖謀洗削禍亂收天下之柄歸之於已籠絡悍夫易以文吏雖藩鎮諸帥名號尚存祿賜尚豐而兵衆土地悉屬於上矣逆腸叛膽消縮順嚮莫敢不臣舉天下之卒凡可以勝甲荷戟者名之曰禁兵則皆天子之衛非人臣所得而有也聚之於京師以固內重之勢而威天下非蠻貊戎狄守備抗拒之地川塗關嶺險害走集之所未嘗不遣戍而宿重兵屯戍之師三歲而代妻子廬墓皆在京師補

一小校汰一羸老必奏籍於中而俟上命以消殺四方之異志故天下兵柄外不在藩鎮內不在強臣不委宦臣不倚近戚利權重器在天子拱把之中雖有侍衛三師非有可專之威徒主符籍而呼趨指導於階前耳天子或御廣殿或獵近郊節以鉦鼓習以騎射角拳勇之材激忠順之氣或幸壁壘視其紀律而省其私隊長賞罰以上日預朝請而抃拜時預讌禮而犒飫歲預衣裘繒絮之賜而華暖慶賞威刑撫取揀練縻制控約無不

自天子為之者故百萬之衆目無他視情無他歸警悼親
愛皆在一人不在臣下如足戴身如指隨臂如子弟翼
父兄如魚鳥從龍鳳至哉雖未能混一兵農實威服四
海聖神久大之略也老氏曰利器不可以示人梅生曰
秦倒持太阿授楚其柄誠能勿失其柄天下雖有不順
莫敢觸其鋒夫太阿之鑄不可以倒持而利器之守不
可以不固也陛下席三聖之烈撫萬世之圖富與地侔
尊與天並恃隆平之極當無為之時游神運化於冲漠

之場棲遲含光於高古之上堯舜不足稱為仁壽周武
不足稱為逸樂夫亂生於治也危生於安也患生於不
足慮也祖宗之事著於史牘傳於世臣故老之口聚若
日月遺策具在按節而舉之朝祭之餘禮樂教化之暇
一御廣殿一帳近郊一幸軍壁旄頭在驅黃屋徐勤從
以橫吹烈響穿雲奮揚國靈聳動士衆斬牲禡野卒蒐
器而簡練訓誓之誅一庸慢甄一忠武以起士卒久安
沈墮之氣以改易天下之視聽夫六馬在馭不提振其

轡策收其羈勒而大酣小寢於其上猝有駭異不蹶則奔祖宗既已聚天下之兵於京師以為內重之勢而威天下付之於復聖矣非可以無為為之也惟陛下留神

議兵策下

臣於上篇言用兵次篇言養兵之制或曰二者孰難臣曰二者俱未易而養兵尤為難用兵之時成敗共濟死生同患而有幸而勝者治安之時養兵失其制則禍實躡武而起矣唐魏公對文皇曰創業易守成難非空言

也唐穆宗於不用兵之時姑息而至於衰壞五代之君
明斷武健莫過於後唐莊宗者起師雲中南向而爭天
下驍雄智勇周德威之儔莫不畢命罄力百戰於河朔
一日踰鄆趨汴而殺凝之師雖號十萬解甲束手矣然
無學術不知古今治亂之體不知持成養兵之道天下
既定軍律遂弛或潰於外或變於內魄然滅亡矣以取
則得以守則亡此承平養兵之難也李承進嘗事莊宗
太宗以唐事問之承進對曰莊宗惟務姑息將士驕縱

每乘輿出次近郊必叩馬首以勾恩賞若是者非一威
令不行賜予無節因而名亂太祖搏髀而嘆息其不能
以軍法御之也故祖宗之時雄武掠人捕斬百卒川班
訢例全軍誅殛索衛士之無賴者治鐵以錮其頸將校
雖領刺史者苟有罪必杖配士伍操畚鍤冒寒暑皆甘
心焉祥符中副校呂遇醉酒馳馬以歸章聖皇帝曰將
士亡故不令出本班置市買二人此軍制也祖宗朝法
令嚴肅無敢犯者今安敢有醉酒馳馬以歸者乎苟有

之遂置於理一祖二祖相承而治具堅明約束如此故
能草五代之亂而納四海於仁壽禿髮之老生長太平
含哺鼓腹不見變駭陛下御宇數十年循三聖法度而
天下順治可謂仁義之主矣夫太平之久則法有弛而
不舉者法弛而不舉則兵有墮而不習者也兵墮而不
習法弛而不舉身無金瘡未嘗受勞苦之事血氣態度
柔脆驕飽縲衣佻容不類武士目曰禁衛矣而日操纖
巧奇贏游蕩酈閑旅魁什長與部兵相從促襟接席醉

呼博塞驥敗等級忘失名分恬不為怪莫敢訶詰祿賜
歲增帑廩大涸無名不功之賞期若青息輒不為思喚
咻喻咀歲律寢壞士卒咸知主上之仁故將臣莫敢
獨治之者一有奮張小欲控約懲戢之卒自為黨與悖
氣橫胸憤口誹謗囂囂動矣慶歷以來大異三代作戍
於保者以賜金中罷殺守倖脅將吏嬰城而假息戍於
甘陵者挾妖民盜庫兵而為僭環衛誰何之人闖禁藩
觸寶瑟臣思之寒入毛骨伍中之走卒躍出馳道排入

省寺而詬辱大臣庶藩列羣縷帛囊米小不滿望則聚首而議變禍大亂芽孰甚於此者非人主寔斷電耀長轡遠策羈之有宜而為之有漸將何以草此陛下玩而不為之圖其耳目熟習其氣焰完就其根蔓盤織其角觫愈剛幾世之後必將豪奪閭里鍾係老幼俘取金帛使百姓不得寧飏易將帥使朝廷不得制陛下取唐末及五代之事觀之非臣言之過也故臣願於可為之時選賢將提法令節姑息之澤峻有罪之誅使恩出於

非常威出於不測人主為之士心焉有不服者夫用兵
養兵之術二者皆未易而養兵尤為難今兵不用矣養
兵之術無他惟因事而痛治之無純以仁治而已矣

議戎策上

金燕古為瀕山多馬之國其土莽平宜畜牧耕稼其民
翹健使弓矢習騎射樂鬪輕死中國得之足以蔽障外
裔外商得之足以搖動中國蚩尤有涿鹿之野故叛黃
帝舜以青冀分野又大剖其北籬而為幽為并為營周

官職方氏掌九服之圖漚夷淩易之浸皆在其地戰國之時為燕國唐之時為范陽節度夫燕一國也范陽一鎮也以一國之力斗絕在戎夷中獨立幾八百餘年遂與周室終始而不為匈奴所吞者是其力足以獨捍匈奴也范陽一鎮之地宿兵不滿數萬而奚契丹不能輒苦趙魏滄景者其力足以獨制外裔也昔以一國之力而不憚匈奴今以天下之力而不勝其勞敝昔以一鎮之力而不憚奚契丹今以天下之力而懷懷常為憂其故何也燕國有朝鮮遼東雲中九原隰山樓煩易水以為之塞范陽有盧龍古北松亭孤門之要以為守用力少而塞之易此其能以一國一鎮截然中立而不憚匈奴奚契丹也自石晉割幽薊檀順媯儒武應寰朔涿蔚賂我以市天下而營平易亦陷於北阻固扼束我皆失之而劃滄霸瓦橋信安肅廣信保定常山忻苛嵐火山寧化千里平廣之地以為界戎軍寇馬馳突去來如股掌之上耳此天下之所以不勝勞敝而懷懷常為憂也

敵侵之益易我守之益難故時平而屯戍之費不得息敵之覘中國也近中國備敵之處也多故力勞而勢益分間有憂國之將不過廣塘水而已獻謀之臣不過啖閼氏可汗悅來使而已使土在其外而為沮洳於腹中開河川泉瀆灌廬墓耕牧之地包七州廣數百里東起泥沽海口西達邊吳淀堆蒲藻魚蚌生之而挂食皆漕取於內地並西山尚缺百里曾未足限隔戎馬而邊民喪其業矣歲輸者不可一日而不繼遺之珠犀劍帶皆府庫上選乘輿之副拳然而如鄭衛之地事晉楚聘使所出之郡補徵道牽馬牛圻亭候捕雉兔羅果蔬飭倡樂聚薪炭僕役於夷人者不可勝數和親不戰而勞費如用兵之時矣竊譬之千金之家寇盜在藩牆之內不治格鬪攘卻之具而方施塹闕下以為守盜者從而笑之塘水是也又譬之懦夫與鷙獸相厄於野棄體肉飼之而祈免於害不忍萬全之時而先事一聞和親之賂是也古者固非忘和親也晉諸侯國耳用大夫魏絳之

說而和諸戎以獲實利日賈其上民狎於野穡人成功
夷狄事晉師徒不勤兵甲不頓遠至邇安則和親之
術誠利矣今幽營為敵有內地又為塘而民不得耕屈
中國以奉殊無遺力矣而師徒之戍不得息遠者主而
邇人不為之安如是而為和親何為者耶議者粗日月
之安而慮之不先將見天賜之穴日盈中國之力不可
支然後破盟犯約而突盜吾民矣

議戎策下

唐太宗如彼其才而持金帛盟辭頡利可汗館帝女於外而許延陁何也當時羣臣或不能通知太宗之意夫太宗雖以武定天下然民方厭苦於兵頡利延陁未有可誅之大罪故厚之以貨賂許之以婚姻若曰戰非我所欲而寧負媿所以甚戎之曲而盈中國之氣也故卒擒頡利可汗延陁衰破失據而死則太宗之謀不為不遠契丹本唐之松漠都督國於黃龍遼澤間東西才三千里自欽德間光啟之亂服屬達靺奚室韋之屬而安巴

堅下渤海夫餘晉祖以地與耶律壽則西至於大夏東
距於女真南界於瓦橋北厭於靺鞨其氣常在中國上
咸平景德間數獵於趙魏之郊殘城郭係老幼而去先
聖仁術睿算不忍以吾民困敝於奔命姑與之和親所
以結約慰藉之甚厚自慶歷以來又嘗為非意難可之
詞以動中國頻走問使擾邊民之生朝廷徒增其好幣
而足其求金人今日驕中國之怒而山東三尺童子皆
思奮寸鐵以搏金人而償陵驚侵辱之宿憤矣臣竊意

其為天亡之時也昔者賈誼欲施五餌三表係單于之頸以謂賜之以盛服車乘以壞其目盛食珍味以壞其口賜之以音樂婦人以壞其身賜之以高堂會庫奴婢以壞其腹於來降者上召幸之相娛樂以壞其心而史氏言其術為疎濶今耶律氏之君臣醉於玉帛而沉溺於寶賂其民生長和親知戰也少不習寇盜而或為進士學不以騎射為生而樂土者安室家與古外裔之俗甚異誼之說且效於今矣臣聞之山後遺民苦其賦役

而懷中土之思彼之將相雜用南北之人權力相傾乎
其勢不平而相軋乘壞之隙殆將有豪傑舉土以屬於
我而請為藩臣者彼久客我土中心疑畏而常不得寧
故時為慢書以觀中國之強弱深淺而我輒為之擾駭
則固宜為外商之所輕矣天下大事有人臣不敢首議
必俟人主之斷而自為然後可以成其功者河湟之計
其一也陛下雖不欲戰戎人驕甚而天下不能堪其勢
必至於戰厲兵選將舉得其策河湟可以一日而復扼

范陽盧龍之塞室松亭狐門古北之穴決去波塘化為
沃土募耕戰之士人賦百畝而處之養馬積粟以實塞
下財京師長無北顧之憂矣詩曰昔先王受命有如召
公日辟國百里今也日蹙國百里惟今之人不尚有舊
唐獻文尚能復河隴百年久陷之地而況於盛明之主
乎陛下亦篤於和親而緩於兵備彼中之情不可必得
他族偏處在肘腋之下伺河水可渡掩吾人之不虞萬
世之憂也

--	--	--	--	--	--	--	--

宋文選卷二十

欽定四庫全書

宋文選卷二十一

李邦直文

議官策上

原今之大弊皆入仕之門雜而衆也入仕之門雜而衆
故仕者日藩有罷職而歸幾涉三歲不得再調者進未
得祿仕退失其田廬故廉白之人身雖掛仕版名雖榮
聖世而無貲以繼其生眈眈焉常不得其所上急於父

母甘旨滫瀡之養下迫於妻孥之饘粥則守節不篤者
或乘其間隙匱困之時起而牟利買販江湖干托郡邑
商筭盈縮秤校毫厘匿關市之征逐舟車之動以規什
一之得進則為王官退則為市人進則覓筭而治事號
為民師退則妄覲苟獲不顧行義故仕路污辱而廉恥
之風大墜朝廷患仕者之日蕃無職以處之且使罷者
久不獲其所故難棘其塗以蹈藉來者而有司苟為之
文迂為之格張設難漏之密網羅取非意之細罪離合

增廣其薦員使其不得應條缺礙遲久其歲考使其不得滿課從是而仕者益難故薄於得失而逐於勢利前者冒昧以進後來者竟隘而馳夸偽佻淺之流更相眈眈迭相攻攘相誅不操矛相覆不設筭而媮風熾險濤作恬讓靖默真能實德之士或羞與之偶寧自卻於羈旅草野而不入於其塗有恥者上欲進之而日益退無恥者上欲退之而日益進徒歲為一禁時下一令詳明深切繩約而條責之揭而示之以義利之路曰爾為篤

厚無為薄惡如是將以復仁義革士風臣竊以為無益也故臣謂天下之大弊由仕者藩仕者藩由入仕之門雜而衆也夫入仕之門乃弊之原也而議者不塞其源欲止其流不迹其本欲救其末不能清入仕之門而束縛爬羅痛治其已仕者入仕之時如數兵徒如積麻竹不知名器之可惜也已仕之後如障寇盜如捕螟蝗不知士心愈離臣愚以為過矣故願陛下清入仕之門入仕者簡則職有餘裕吏無閒員而祿得以繼污者反

其庶困者遂其節爭者息其險讓者榮其高仕路平夷而風化易隆矣

議官策中

天下既然之弊臣言其端矣請復為陛下詳言所以革者夫爵祿所以分別賢不肖勸天下為善之具惟用之有當否輕重耳在小人則輕在君子則重故不可使小人得之也易得之則輕難得之則重故不可使人易得之也多得之則輕寡得之則重故不可使人多得之也

爵祿輕則天下之人不知勸而朝廷輕爵祿重則天下之人知勸而朝廷重矣故爵祿由王者出而王者不敢易以予人天下莫不願而王者不敢常以予人有私人以賜無私人以官有世人以祿無世人以爵使天下瞻慕榮向之不足則君子登功樂職而治道進矣故古之聖賢之君相與謀議於廟堂之上厯數安危治亂之大計莫不先用人之急而後百事何哉其得失之間誠足為天下慮也傳曰法後王堯舜三代之事雖詩書之所

詳具不可以復之於今矣祖宗之事皆耆艾耳目之接其慎惜名器而致天下於治今何憚而不為之法乎開寶之詔伎術之人不得外補天禧之詔已補者不得輒遷所謂廷尉評者固已目為清望官而責宰相之輕授於人爵祿如是之重也歲登進士才十數而雜色入流之人尚寡宗戚貴近無澆沐之請過請者召而戒抑之為宰相子尚有褐衣未命者況下此者耶樂師以久次乞補外官太祖弗之許止以為大樂令予人如是之難也

於時省寺府監與郡縣之秩皆有定員隨闕授擬而未嘗有家居待歲者中外百職或久而不得代考課院患無閒員以足郡縣之闕官得之者如是之寡也今官選之徒如日中為市衝衝而來小有所挾皆可以得志或以門蔭進或以小史進或以醫卜工伎進或富賈人持錢刀芟芻貿而得入或衛兵之校百十為輩捨挺而軒冕爵祿之輕也如此人主既務以恩澤為治向者政事之臣又或破壞故法瀟灑而誕散之故陰以賣安於時

而自交於天下決隄防注雨露倒庫府傾纁黃以足進者之心使大弊流於今而未可以遽息予人之易也又如此今一官而數人共之有既去者有已至者有將至者三班吏部審官之籍不啻萬官文武之列十倍于昔其多也又如此祖宗之時而爵祿重今之世而爵祿輕祖宗之時而予人之難今之世而予人之易祖宗之時而得之者寡今之世而得之者多豈不謂予者之過而謂進者之罪耶夫賢者之見貴于天下有所施為而衆莫

不率以名器待之于上而異于小人也將吏之所以令其衆而士卒氣懾神聳以涯分素殊而莫測其尊且大也今匹夫一伎之末僕役趨走之人而與君子同名而共器商販之賤知官之可市而得指手坐而為政者以謂輕于我之千金驅呵遮迺之卒知吾一日皆可以為將吏而辨其事冒慢其上驕桀而難令非所以示天下也嘉祐之始也嘗採議臣之策而懲其弊詔減任子之令期歲補者為三歲三歲者為再郊罷三丞告老及外

臣遷任之澤進士明經約以天聖之中式而令百司必
滿實格不得假小勞緣他請歲年而入仕矣議者默計
之以謂歲可損千數施之五六載其數頗耗而仕者差
澄清矣雖然其弊猶未甚大更者污冗之類因仍而未
盡釐也深惟陛下行鬻爵之令不若節財用緩刀筆姦
吏選試之格與其賞姦吏不若節進廉能汰小人非冀
之得與其愜滿小人之心不若寬天下良民之力則祖
宗之治可繼也朝廷何不為此以囂怨之生于此耶人

主弗為而人臣者為之則囂怨之所歸也唐開元之君
罷斜封官三千而天下廓然無事惟人主未卓然而為
之耳又何以囂怨為疑哉

議官策下

王者各有所貴堯舜貴道德夏貴功商貴老周貴同姓
秦貴法吏西漢貴才謀東漢貴經術魏貴文章晉貴名
理周隋貴氏族所貴皆不同觀其所貴則知其治體之
優劣然最無謂者其氏族乎非便國家也非利天下也

非本教化也惟私貴者之子弟優足以強宗使之蠹國而漁食天下王者于彼何哉然氏族之家亦有可用而大有補于世者矣如其不較術業累累而貴之非公天下之道也古者不世爵有公卿大夫之子弟則國為之置師保羣衆而教之告之以禮樂詩書德行道藝之說俟其器成德就然後以名聞于天子而升之太學次第而官使之故四十而仕五十而爵古之通制也夏王官人以世而成湯數之謂之惡政尹氏世職春秋議之今

文武之臣自五品以上遠近其年高下其等咸得保任其子孫矣子孫既官又保任其同宗矣宗族既官又得保任其外姻矣幸而壽則嫡庶之支內外之戚無不列為王官古未嘗有恩厚臣下若此者也故有祿乳嬉劇之歲天子賜之訓誥而爵命之矣未能勝衣而襲以青紫曾不知四方車馬之數足而名籍于省寺加之士民之上揭于才賢而未用者之目此臣之所以嘆息駭異而為之言也朝廷知古之所以置設官爵之意乎以民

之喜為不善恐靡然漸入于亂故標榜尊異其有德之人以為之師又以物廣事衆一人不可兼聽之故選才智者使居衆愚者之上以分小大之務而司民之曲直如是而已故用人不可不慎也彼提孩何為者而官爵亟加之歟天下才德之士抱其器或湮沉阨窮老死于田畝而不得用泯焉不若貴者之提孩宜乎士心之有不得于上也國家患進士明經之多間歲一詔數以二百為之常限冠其選者始預京秩而貴者之蔭計歲且

踰百名波進雖聲病之學然取士之正路本格也取士
凡二歲而出一京秩以恩為之者輒百倍其多可謂本
末不相侔臣願稍汰其弊而立年格使文武之官補蔭
雖如故然必成童以上始得以其名聞惟歸終之澤無
格年齒然復精為課試之令不能涉禮律而通時務者
未許出仕則公卿之子孫咸竟于學幾于重慎爵祿之
漸矣昔衛懿公好鶴鶴有乘軒者及與狄戰國人皆曰
使鶴鶴實有祿位夫貴之提孩未可以官也國家之于

臣下祿之重責之輕生有榮歿有報澤非不加矣爵祿天下之公器惟聖神留意焉

重計策

以王官易販夫貪賈之錢刀其為國之恩辱議者之所素病也而終不得寢役上農而闕郡國之漕輓其傷敗民產天下之所共閔也而終不可得蠲酒榷茶禁治私鹽筴關河之征鄧閔之賦凡百物之產皆有常稅苛取之術徧于天下又為告訐之募督索之刑以威名而誅

亡命之人其敗化亂義有識者莫不惜此而終不得少
損赤子耗病而不得收恤國體墮而朝廷不能顧是者
何故非由經用之急乎今夫兵有常賜吏有常祿官省
之所費郊廟之所奉河防之脩與夷狄之賂是皆不可
已之用一旦弗繼則變故或緣是而起其勢誠不得緩
故國家汲汲于此而以財物為首務議及教化則謂之
虛語以金穀為要任禮樂者謂之贅疣之官善聚斂培
克者以為良能仁民愛物則謂之不任職非朝廷之

好物勢使之然也國之號為太平亦已久矣宜可以
追古之治而政日益煩俗日益薄民生長于無事之
際而常遭罹兵寇凶灾天子仁儉如此而四海惶惶
如值淫暴之世亦可嘆嗟也今凡可以得利之門無不
為之不可以有加矣係民之頸鉐民之臂去攘奪者無
幾而宜豐而有餘也罄入以為出惴焉尚恐弗支不幸
而旁有他虞則將有度外之索非常之費不知何術以
足之歟國務莫先于此者矣此未之救則雖堯舜不能

以垂拱而治雖周公不能興禮樂雖臯陶不能以措刑也夫有朝暮之危者不及為百年之憂若饘粥之乏者未暇治藥石之事有所急者有所緩有所先者有所後也國家未欲為大治則已矣如欲措刑而興禮樂大有為于天下以格垂拱之治則救弊之策何俟而不先為哉臣嘗學易至于泰卦之變未嘗不歎也夫泰變則賁賁變則蠱蠱生于賁賁生于泰泰者大通之世也賁者文明之世也蠱者當弊而出乎文明者也今之時承祖宗

之業思繁禮縟文明之餘蠱之所生也陛下撫養天下之人未能為之節而又重之大蠱有三而他蠱尚不預費冗而為蠱兵冗而為蠱官冗而為蠱蠱生于昔而大熾于今不可以不變矣易窮則變變則通通則久國家之所憚為者嘗謂蠱已成而勢不可變變而去之則將羣起而叫詭陵突而怨上不得已而又復之是未知其道耳夫去蠱莫若漸人之常情猝據則擾駭平緩則靜恬以歲月去之而使之不知善變者也急于治者知蠱之

不可不變又欲一瞬而去百年之蠱不已踈乎今之三
司使皆用天下重名之臣為之者類不得久非謹而罷
去則擢升二府如舟之寄于衝波瞥爾而游雖有志于
此者亦何能盡其用耶夫百口之家以滛費多而附麗
衆故貲業日殫而不足汨汨不治將至于寒饑悉力以
供之挈邀貨利則有冠貪不善之名而招禍于外亟絕
其費而斥遣僮奴謝去賓客則有難已之勢不平之論
而構怨于內方今之弊亦何以異于是屬之才者而使

徐為之治日輯其樵牧月勤其種樹歲謹其出入則浮
費消蓄積長而內外莫之知

實備策

易之象以龍馬明乾坤之用夫乾坤之氣變化之大無
窮而不可測而聖人獨以二物明之者何故以為天之
用而極其可見者雲雨風霆而已雲雨風霆非龍無以
行之則天下之物有能盡天之用者莫過乎龍也地之
用亦不可得而極其可見者際乎海深入乎蠻夷而無

有涯畔人之力不足以勝之而馳騖戰鬪之涉地之遠
非用馬則弗能濟則地之用又莫若乎馬此易之所以
重乎龍與馬偕之于乾坤也國之寶畜獸之等夷莫重
乎馬易象之所貴周官之所列小雅魯頌之所載史氏
傳記兵家之說所脩兵之勝負繫焉國之虛實強弱繫
焉蠻夷戎狄四方之民其俗不同其輕死而喜為中國
寇盜一也然而能深入而為大患者自古常在于西北
不在于東南其故何也馬出于西北而不出于東南也

冒頓單于數十萬騎圍高祖于平城驕驪駿白皆從其方之色多馬如此故能屈中國之勢孝武乘文景之富奮擊匈奴匈奴少衰矣後以馬少遂無復出唐文皇既定天下席其勝勢破突厥誅高昌平吐谷渾繼之以高宗碎高麗擒百濟而中國之地西至于馬耆北踰于陰山盡得多馬之土故分坊布于隴右而唐馬最盛今之馬大抵衰耗不及于漢唐者何也多馬之土不為中國而為狄也耶律氏之君以馬上為國不騎則不能戰故

其兵以馬為命女真亦嘗通馬間市于我矣詔蠲大謝
島民租令操舟以泛馬耶律患之置戍于海岸而女真
之貢不能至矣繼遷玩戰日久而馬大耗德明臣順以
偷其安懷其種落專其畜牧者凡三十餘年寶元間至
以谷量馬故元昊兵氣飄逸而為邊患矣秦夏雜羌雖
以馬為市然皆癰疾之餘中國固未嘗得之也西北之
產不入于中國中國之所恃蕃吾馬而已而馬官日以
弛馬政日以壞朝廷曾莫之計以失兵備猝然有不得

已之戰顧欲驅步卒馳沙漠而捍堂堂之鋒乎伯益知
鳥獸之情而畜馬息故帝舜氏之以羸而俾世其任非
子牧于汧渭而有功故周孝王邑之于秦而不奪其業
王毛仲張萬歲強幹而知馬事故唐付之以閑廐監牧
之政勛階至開府而仍典焉是擇其人專其職久其任
而貴其功也今之羣牧數十年之間為之者凡幾人以
知馬而任者誰耶任之而有功效者誰耶以無勞而得
大譴者又誰耶間有可任者亦未及究馬之情諳馬之數

而徙矣故馬官覩馬之耗登蔑若秦之視楚人之亡羊而弗之恤此國馬之所以不繁也周之時有庾人校人圉師牧人趨馬巫馬咸專其事而不復治他春秋之時鄭雖小國以下大夫為師則其餘列國莫不有馬官矣故任久職專則政舉而畜牧遂字令當求知馬之人而任之惟貴與侍從之人臣其貲地迭處而兼領馬上之任之也為恩而已非痛責以馬事也下之受是任幸增廩給便役使而已弗以其事自任也故不親其勞不悉

其務田業有遺利吏卒有遺力國之寶畜聚散于沮洳
鴻鹵之澤暴露于冰雪無水草之野相枕藉債路而物
數以大耗可不為之惜哉夫畜牧止家人野夫之事爾
少多之食出入之時惟其便而不可以素為之節要在
適馬之性使蕃息而已矣不知付之于其人治之如家
人野夫之事而嚴為條教舊今日積而新請繼至吏卒
惶惑不知所以為者馬之疾不同而不敢不殊其寒溫
劑其肥瘠老壯所任之不同而不敢不均其出入與食之

多少局局欲以文法治馬求國馬之蕃不可得也今欲養馬蕃之必擇其人必專其職必久其任使畢力于事而責成功吏之廢置卒之誅賞寒暑耕牧牝牡食息之節適其便而相宜一切無束以小法惟視其歲增之數如何則馬政舉而兵備漸實矣國家于安閒無事之時其失嘗在于因循不能先事而有所思一朝急猝之變起則煩憂而不知措以敗大事為中國無窮之辱惟馬又非可以急索而得者可不預慮之哉

明責策

今天下之勢如何哉君仁而民不被澤兵多而夷狄驕
時平而生民困土廣而中國之氣嘗屈灾歲少而財益
匱文法備而吏民姦時之多弊也如此而以天下之大
萬官之富卒未見奮然而大有為能一剷當世之弊致
吾君復之乎前古之治者何乏人之如是耶豈治平之
世無所施其才耶將用之非其道才有而不克施耶謂
世之乏人則古未嘗有無人之世謂治平之世無施其

才則多弊又如前所陳者夫陰陽之英氣天地之醇靈生而為賢智之士陰陽之英氣天地之醇靈未聞有時而歇故天下未嘗無賢也議者患治道之不及于古則曰天下無賢不知有賢而不能用也夫用賢而非其道瑰傑豪偉之材皆化為偷懦循縮而亡能為矣則以謂無人焉此可為悼歎者也亦嘗聞古者之用人矣視成不視始責大不責細過一而功百忘其闕而圖其效心至而迹未至則優假而待其所施苟付之以事固勿屑

其餘也今者之用人較小罪而不觀大節恤浮語而不
究實用雖有稷契周召之佐類以一言一事而為之進
退迹稍出于庭壇畦隴之外志不獲就業不能訖而去
矣惟圖已持祿避事隨時之人乃無譴而得安焉故庸
平者安步而進忠憤者半途而氣折大臣憚法小臣陵
兢而天下之事靡靡日入于衰敝其所以然者有其人
而不能用其人而不能盡之之失也今夫拔一臣而
加之百官之上以為輔相非求其謹潔而無過將任之

以天下之責也拔一士而加之一郡一邑之上以為守令非求其能自全將任之以一郡一邑之責也拔一夫而加之萬衆之上以為將帥非求其循法而不失小行將任之以安危勝負之責也故古者責宰相必曰廣教化陰陽使百官各任其職責郡守縣令必曰使豪強沮服盜賊不作百姓安業境內大治責將帥必曰士卒樂為用敵國不敢謀不此則凡執事者莫不皆有責焉故上下自任其責而天子無為矣今則不然罷退宰相

皆攻其疵瑕而未嘗指天下之不治為宰相之罪糾劾
守令者皆以小法而未嘗指郡邑之不治為守令之罪
譴謫將帥者皆以庖厨宴饋之間微文細故之末未嘗
以蠻夷驕橫兵氣弗強為將帥之罪故上下莫自任其
責局局自守惟求不入于罪而朝廷大計生民實患卒
無有任者是故以天下之大萬官之富而嘗若無其人
尊官厚祿者相繼而英績偉烈寂寂于數十載資格之
所羈縛文法之所躡蹀抱才負志不得有為而老死泯

沒者相望于下可不惜哉夫人臣之姦身安于寵形無可罪而實不任責是為大姦張禹之所以默默而亡漢李林甫之所以守格令而亡唐也今皆重夫寡過以為賢而嫉夫敢為者以為生事一落陷穽沒齒不復言故猾民悍吏得以輕罪把持其上游士談客得以口舌恐嚇內外之臣而招其貲胥吏得以挾簿書執格例而爭於廟堂之前當其任者知姦而不敢除見賢而不敢用天下之害不得亟罷天下之務不敢亟為因仍苟且

相顧腹議名曰至公而萬事益病其弊莫甚于今之世者欲救斯弊是亦非難寬小過責大體而已矣

勸吏策

夫人之所以異于羣物者以其有恥也恥者趨善之本原而聖人之教所從而立也聖人因人情之有恥而示之以榮辱之路扶善而沮惡貴賢而賤不肖由于義則天下皆指以為君子莫不聳踊企慕之以為榮不由義則天下皆指以為小人又從而簡賤之羞與為親舊師

友是以喜為顯名惡為污名顯名之在身未爵祿而出處尊安志氣充飽污名之在身雖位于衆人之上金玉盈其藏而嘗若心腹之抱疽毒首領之嬰木索又況于禍福之實加之哉故聖賢在上則榮人以賞辱人以刑聖賢在下則榮人以名辱人以義名義為之本刑賞為之用刑賞為一時之榮辱而其權在時君名義為萬世之榮辱而其權在清議刑賞猶有弊也名義未嘗有弊也故聖人先之以名義而後之以刑賞孔子曰政之不

行也教之不成也爵祿不足勸也刑賞不足恥也先名義之謂也善觀天下者欲知天下治亂之勢無觀于他觀名義與刑賞斯知天下矣善觀人者欲知人之可使為善不可使為善無觀于他觀其有恥與無恥斯知人矣三代之所以治者庶恥存也未世之所以亂者庶恥喪也朝廷之臣天下之俗頑悍無恥一作若詬無節此賈誼之所以太息于漢也臣有一言可以不褻刑罰不費爵賞而起天下之治曰勸吏勸吏之要曰示榮辱今

諸路各有監司以督藩郡郡有守倅以總屬邑于治皆得按察所部之吏然自非見告而入于罪與應條貫保薦者其餘貪廉強懦優劣臧否一切不以關意雖有龔黃卓魯之儔亦汨汨而去亡以異于常人此廉恥之道所以闕吏之所以不勸也臣願詔內外諸臣凡所部文武之吏各歲差其材行為上中下三等而奏籍于朝惟臨部與在官未及期者乃使來歲一部之吏則守倅上之一路之吏則監司上之文吏則文吏之長上之武吏則

武吏之長上之天子與二府總天下之奏籍于中可以
據幾案獵紙尾而知天下文武材行優劣之大畧其失
實多者非私其人則鑒之妄也非鑒之妄則懈于事而
不為之審也其得實多者或明而公或詳而能舉其職
則以其得實失實之多少又可以坐視奏籍而知奏者
之如何董仲舒曰所貢賢者有賞所貢不肖者有罰且
以觀大臣之能此其是已臣以謂若此則為上官而法
當按察者不敢因循塞默而辜朝廷之寄必且審聽風

謠孜孜于審核以求其吏之實為小官而在所部者恥
名隸不肖之籍而期於在高課以榮其志亦將激昂奮
迅以競于名節苛者可以抑而為寬懦者可以勉而為
立貪者可以憚而為廉邪者可以沮而為直未褻刑罰
未費爵賞而揚清激濁揭榮辱之路以示天下天下之
吏莫不知恥而避惡趨善矣臣故以此為勸吏之術

宋文選卷二十一